

Durante Simposio "Bo Curazon ta den bo man"

Prome Minister Eman a pidi mediconan pa traha mas como un team



DIASABRA a tuma lugar e prome simposio organisa pa Aruba Heart Foundation cu e aña aki ta celebrando su di 15 aniversario sirbiendo pueblo di Aruba. Aruba Heart Foundation tin como meta principal traha riba conscientisacion di nos hendenan pa evita asina malesa di curazon.

E fundacion ta aplica e regla cu mas un hende sa di su curpa, miho ekipa e ta pa cuida su salud dor di porehempel come saludabel y haci ehersicio regularmente. Dilanti un sala yen di medico y paramediconan, Prome Minister, Mike Eman, re-emplasando Minister di Salubridad Visser, a hiba palabra como prome orador. Aunke, manera e mes a enfoka cu e no ta un experto riba tereno medico, pero ta un hurista y un politico, e mester remarca cu su discurso tabata uno impresionante.

Prome Minister a recorda esnan presente cu como isla chikito Aruba mester sinti su mes sumamente orguyoso di tin un simposio di e taya aki na Aruba.

Salud di nos hendenan ta wordo mihor cuida ora nos profesionalnan riba tereno medico sa mas.

E tin un bon sentimento ora e ta mira y varios bes atende simposionan asina. E ta kere cu devocion ta masha esencial den e profesion aki.

Un persona cu bira dokter ta haci'e na prome lugar, pasobra p'e e salud di otroonan ta relevante.

Prome Minister Eman a pidi aten-

cion di esnan den sala pa algo cu tin'e tog un poco preocupa y kier e expresa esaki durante e simposio di curazon aki.

Eman ta di opinion cu no tin un mihor plataforma pa refleha su inquietud cu no ta na un simposio di curazon, pasobra e curazon – segun filosofonan - den cierto forma tin influencia riba nos forma di pensa y actua.

Loke Prome Minister Eman kier mira y a pone acento riba dje ta un mihor cooperacion entre

mediconan na Aruba cu segun e ta haci falta aki. El a conta e audiencia con tempo cu apenas e tabata conoce su señora cu esaki a bira basta malo na Merca y nan a bay un hospital na Boston. Loke a hala su atencion tabata cu e bon cooperacion cu tabatin entre e dokternan eynan.

Lamentablemente e teamwork aki no semper tey na Aruba. Ta pesey su yamada n'e specialistanan di curazon ta pa mehora e comunicacion y asina mehora

na mes momento e trabao conhunto.

E curazon ta un parti esencial ora nos tuma decisionnan, pues laga esaki keda como un refleho di e dia di ey.

Eman a bisa cu: "Gratitud ta e memoria di e curason". E vision di Prome Minister ta pa nos tur, sea cual sea nos profesion, traha como un team pa engrandece nos isla. Eman a conta con el a percura pa su Ministernan ta bao un solo dak p'asina nan por topa

otro regularmente, discuti topiconan importante y ora mester tuma decisionnan cu ta yuda henter un pais.

E ultimo logro di un bon cooperacion y teamwork t'esun recien di e noticia di reapertura di Valero. "Ban traha brugnan di comunicacion. Si awe nos tur pone nos conocimiento y experiencia hunto nos lo tin un mihor mundo medico na Aruba", Prome Minister Eman a conclui su discurso.